

HUGHES, HOWEL HARRIS (1873 - 1956), gweinidog (MC), prifathro'r Coleg Diwinyddol, Aberystwyth

**Enw:** Howel Harris Hughes

**Dyddiad geni:** 1873

**Dyddiad marw:** 1956

**Priod:** Margaret Ellen Hughes (née Roberts)

**Rhiant:** Jane Hughes

**Rhiant:** J. Richard Hughes

**Rhyw:** Gwryw

**Galwedigaeth:** gweinidog (MC), prifathro'r Coleg Diwinyddol, Aberystwyth

**Maes gweithgaredd:** Crefydd; Addysg

**Awdur:** Gomer Morgan Roberts

Ganwyd 7 Medi 1873, ym Mryn-teg, Llanfair Mathafarn Eithaf, Môn, mab J. Richard Hughes, gweinidog (MC), a Jane ei briod. Addysgwyd ef yn ysgol ramadeg Biwmares, Coleg y Brifysgol, Bangor (lle graddiodd yn y celfyddydau), a Choleg Diwinyddol y Bala (lle graddiodd mewn diwinyddiaeth - un o'r ddau gyntaf a gafodd radd B.D. Cymru). Ordeiniwyd ef yn 1901, a bu'n gweinigogaethu ym Mhenmachno (1901-03), Maenofferen, Blaenau Ffestiniog (1903-07), Moriah, Caernarfon (1907-09), a Princes Road, Lerpwl (1909-27). Yn 1927 penodwyd ef yn brifathro 'r Coleg Diwinyddol, Aberystwyth, a bu yn y swydd honno hyd 1939. Wedi ymddeol symudodd i gylch Lerpwl gan gymryd gofal eglwys Gymraeg Southport am gyfnod (1939-50). Priododd, 1902, Margaret Ellen, merch [Griffith Roberts](#) ('Gwrtheyrn'), Y Bala; ganwyd iddynt dri o feibion. Dioddefodd gryn lesgedd yn ei flynyddoedd olaf, a bu farw 23 Tachwedd 1956.

Yr oedd yn bregethwr grymus a dylanwadol yn ei ddydd, a chofid yn hir am ambell oedfa dan ei weinigogaeth mewn cymanfa a sasiwn. Datblygodd yn wr o ddylanwad yn ei Gyfundeb. Bu'n llywydd Sasiwn y Gogledd (1943), ac yn llywydd y Gymanfa Gyffredinol yn ystod Rhyfel Byd II, 1939-41. Ef oedd ysgrifennydd y pwyllgor ar yr athrawiaeth i'r Comisiwn Ad-drefnu ar ôl Rhyfel Byd I, ac ef oedd un o'r pedwar a luniodd y 'Datganiad byr ar ffydd a buchedd Eglwys Bresbyteriaidd Cymru'. Cyfrifid ei *Esboniad ar lyfr Amos* (1924) yn un o'r goreuon o'r gyfres a gyhoeddwyd gan y Cyfundeb. Gwr addfwyn a graslon oedd Howel Harris Hughes, a chofid amdano gan ei wrandawyr a'i ddisgyblion fel sant a phroffwyd.

## Awdur

Y Parchedig Gomer Morgan Roberts, (1904 - 1993)

## Ffynonellau

*Who's who in Wales*, 1921, 195

*Blwyddiadur y Methodistiaid Calфинаidd*, 1958, 247-8

William Morris (gol.), *Deg o Enwogion* (1965), 47-50

R. H. Evans, *Datganiad byr ar ffydd a buchedd. Pennod ddiweddar yn hanes Eglwys Bresbyteraidd Cymru* (Caernarfon 1971), 40-3

adnabyddiaeth personol

## Delweddau

LIGC: [Parch. Howell H. Hughes, B.A., B.D](#)

John Wickens, [Parch. Howell H. Hughes, B.A., B.D.](#)

## Dolenni Ychwanegol

Wikidata: [Q20821143](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

